

# INUIT ATAQATIGIIT INATSISARTUNI



Januar 2023

UPA2023/66

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Iloqarfigisaaq qimallugu erniartortartut ilaqutaasalu, unammillernartumik atugarisaat pillugit qulaajaanermik iliuusissatullu pilersaarummik suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissatut pilersaarut UKA24-p aallartinnginnerani saqqummiunneqarsimassaaq.**

(Inatsisartunut ilaasortaq Mikivsuk Thomassen, Inuit Ataqatigiit)

## **Tunngavilersuut:**

Iloqarfigisaaq qimallugu erniartortoqartariaqarneq isummannaannerusumik ernisoqarsinnaanissaa uloriarnartorsiortoqarsinnaaneralu peqqutaallutik kiisalu ernisussiortussaaleqineq ilinniarsimasunillu sulisussaaleqineq peqqutaalluni atuuppoq.

Nunatsinni peqqinnissaqarfiit nunap immikkoortuinut eqiterneqarnikuupput, Nuuk, Ilulissat, Sisimiut, Qaqortoq, illoqarfiillu avataani najugaqaraanni illoqarfigisaaq qimallugu erniartortoqartarpoq, taamanna tunngavingalugu ernisussat piffissami sivisusinnaasumi ilaqtattatik qimallugit peqqinnissaqarfinni ernisarfilinnut aallartariaqartarput. Taamatut aaqquissuussisimanerput ernisussamut ilaqutariinnullu oqitsuinnaanngilaq.

Ajornartorsiut alla tassaavoq erniartortoqartillugu tassanngaannartumillu aallartoqartillugu ilaqutariit eqqorneqartarnerat. Ilaatigut nakorsat peqqissaasullu aaliangigaannik tassanngaannartumik aallartoqartarpoq. Taamattoqartillugu ilaqutariinnut sakkortusinnaavoq ingammik nalorninartorsiorfinnut nalaanneqartillugit. Taassuma saniatigut timikkut tarnikkullu kisimiilluni erniartorneq oqimaatsuuvoq.

Peqqinnissaqarfimmiit naartusoq tassanngaannartumik aallartsinneqassasoq aaliangerneqaraangat, naartusorlu kisimiilluni aallartariaqartillugu, ilaqutariinnut annertuumik sunnuteqartarpoq, taamatullu pisoqartillugu ilaqtattamik qaningisaminnit ilagisaqartarlernissaat pingaaruteqartoq naqissuserusuppara.

Tassanngaannartumik aaliangiisoqaraangat, naartusorlu kisimiilluni aallartinneqariataarnerani ilaqtattamik qaningisamik ataatsimik ilaqartsinneqartarnissaa pingaaruteqarluinnartut naqissuserusuppara.

# INUIT ATAQATIGIIT INATSISARTUNI



Taamaasisoqartillugu naartuumut sunniuteqarnerluttumik ernisussaq uippakajaalersinnaavoq annilaangasoqalerluniluunniit.

Ernisussiortut kattuffiata erniartortitsisarneq pillugu isornartorsiuinera tigussaalluinnartutut isigaara. Tassami erniartornermi ernereernerullu kingorna isumatassimangaarnermik nalaataqartoqarsinnaavoq.

Ernisussiortut Kattuffia avammut nalunaarummini allappoq:

*“Illoqarfimmut allamut erniartotoqassagaangat anaanaasup pisinnaatitaaffigisariaqarpaataataasoq ilaquataasorluunniit peqaatinnissaa.”*

Isumaqaarpunga erniartortitsisarnermut aqqissuussisimanerput qanoq pitsaanerulersissallugu aalajangiisariaqartugut.

Siullertut isumaqaarpunga erniartortarneq meeqqamut ilaqutariinnullu pitsaasumik sunniuteqassappat siusissumik iliuuseqarneq aqqutissaajuartariaqartoq. Toqqammaviussaaq meeqqap naarmiuunerminiit pitsaasumik toqqissisimanartumillu sinaakkusigaasumik inuiaqatigiinnut akulerunnissaa.

Ilaquttat qimallugit erniartortoqartarneq nukippassuarnik atuiffiusarmat nalunartuaannarlunilu erninerup qanoq inerneqarumaarnera, allaat ilaquataqarani ulorianartorsiorsinnaasoqarluni, tamanna allangortinneqartariaqartoq isumaqaarpunga.

Taamatut siunnersuuteqarninnut siunertaavoq Naalakkersuisut ernisartut ilaquataasalu unammillernartumik atugaat susassaqtut attuumassuteqartut peqatigalugit qulaassagaat kingornalu iliuusissamik saqqummiussisoqarumaartoq.

## **Pisortanut aningaasatigut allaffissornikkullu kingunerisassai:**

Iliuusissatut pilersaarusionerme allaffissornikkut isumalluutit ataatsimut atorneqartut A/C fuldmægtigip ukioq kaajallallugu sulineratut aningaasartuutaanissaat naatsorsuutigineqassaaq, tassa 500.000 koruunit.

## **Namminersortunut aningaasaatigut allaffissornikkullu kingunerisassai:**

Soqanngilaq.

## **Innuttaasunut aningaasatigut allaffissornikkullu kingunerisassai:**

Soqanngilaq.

# INUIT ATAQATIGIIT INATSISARTUNI



1

---

<sup>1</sup> <https://knr.gl/kl/nutaarsiassat/ernisussiortuunerit-kattuffiat-nunatta-sineriaani-ernisarneq-ukkatarineqarnerulissaag>